

Flucht nehmen / sondern viel rühmlicher stehen / daß / dieweil dem ganken Reiche grosser Vnkosten auff solche Kriegesrüstung gehet / er mit getröstem vnd beherstem Gemüte einen bequemen Ort außzusehen / da er ein Lager auffschlagen / vnd dasselbige in Eile befestigen lasse / darinnen er des Feindes Anfunfft erwarten könne. Gleich wie solchs Keyser Carolus Quintus Anno 1546. für Ingolstatt gethan / wie der Churfürst von Sachsen / vnd der Landtgraffe von Hessen (welche dazumahl der Protestirenden Stände Feldobersten waren) ihr Key. May. wieder auß Teutschlandt schlagen wolten / auch wohl in acht genommen / vnd ihr Key. May. sich sampt ihrem Kriegesvolcke allda verschancket / vnd den Paß durchs Gebirge in Italiam, daher ihr Key. May. noch das ander Kriegesvolck zukommen solte / eingenommen / vnd des Churfürsten von Sachsen / vnd Landtgraffen von Hessen Anfunfft (vnangesehen / daß sie dem Keyser an Kriegesvolck vnd Macht weit vberlegen waren) mit tapffern vñ vnerschrockenem Gemüte erwartē theten / zc. Wie aber ein solches Lager / nach Gelegenheit desselben Orts / abgestochen vnd befestiget soll werden / das wirdt ein jeder Verstendiger Krieges oder Feldoberster ohn diß mein erinnern / selbst wohl zu machen wissen / aber den Anfahenden zu besserer Nachrichtung / wie solches anzuordnen sey / habe ich solchs allhie einfältig gesetzt / wie man auß folgendem gesetztem Exempel zuvernehmen hat / nemlich / man setzet / der Oberste Feldherr hette einen solchen wolgelegenen Platz außgesehen / welcher an einem Morast gelegen / vnd hinter vns auff vnser Landt zu / daher wir vnser ander Theil Kriegesvolck noch gewertig / einen freyen Paß hetten / auff welchem Ort oder Platz er sein Kriegesvolck mit allem Geschütze geführet / vnd fleissig in acht nimbt / wie er demselben Ort seine Linien oder Schrege nach bestem Vorthail geben vnd ordnen müge / damit solch Lager nach bestem Vorthail mit Pasteyen vñ Behren in eyle müge befestiget werden / lest derwegen den ersten Pfal an das Morast mit A. verzeichnet / einschlagen / vnd vom selben vnd dem Morastwinkel recht abe ein ander Linii / auff die rechte Handt werts vngesehrlich einen kleinen Büchschuß weit nehmen / vnd daselbst den andern Pfal mit 2. verzeichnet / einschlagen / Ferner hat er von diesem Pfal noch eine ander Linii / nicht Winkelrecht / sondern nach dem halben Winkelhaken genommen / vngesehrlich so lang / als die vorige Linii gewesen / vnd zu Ende derselbigen / den dritten Pfal einschlagen lassen / welcher mit 3. verzeichnet ist / vnd von demselben nimbt er abermahl eine Linii nach der Linkenhandt werts / nach dem halben Winkelhaken / vnd abermahl so lang / wie die vorige / lenger oder kürzer / es gilt gleich / vnd lest daselbst den 4. Pfal mit 4. verzeichnet / einstecken / vnd so fort an / biß er gar herum kumpt / als denn ist derselbige Umbkreis des Lagers gemacht / vnd abgezeichnet / wie auß nachfolgender Figur Augenscheinlich zu ersehen ist.

Demonstratio.

Wie